



v.31.03.22

Proxecto de Decreto _____, de _____ de _____, polo que se regula o procedemento para o recoñecemento da situación de dependencia e do dereito ás prestacións do sistema para a autonomía e atención á dependencia, o procedemento para a elaboración do Programa Individual de Atención e a organización e funcionamento dos órganos técnicos competentes.

A atención ao colectivo de poboación con algún tipo de discapacidade ou limitación, que lle causou ou lle pode chegar a causar unha dependencia para as actividades da vida diaria ou necesidades de apoio para a súa autonomía persoal en igualdade de oportunidades, convértese nun reto ineludible para os poderes públicos, que require unha resposta firme, sostida e adaptada ao noso actual modelo de sociedade. Así se establece na Lei 13/2008, do 3 de decembro, de servizos sociais de Galicia, cando no seu artigo 3 formula, como un dos obxectivos do Sistema Galego de Servizos Sociais «garantir a vida independente e a autonomía persoal das persoas en situación de dependencia integrando, para estes efectos, o catálogo de prestacións do sistema para a autonomía e atención á dependencia».

Previamente, a Lei 39/2006, do 14 de decembro, de promoción da autonomía persoal e atención ás persoas en situación de dependencia, regula as condicións básicas de acceso ao denominado Sistema para a Autonomía e Atención á Dependencia (SAAD). Como se establece no seu preámbulo, trátase de configurar un desenvolvemento dos servizos sociais que complementa a acción protectora e poida dar resposta ás necesidades de atención das persoas en situación de dependencia.

Neste labor xogan un papel fundamental as comunidades autónomas e, cando corresponda dentro do seu ámbito competencial, as entidades locais. En concreto, no artigo 11 atribúese ás comunidades autónomas a planificación, a ordenación e a coordinación, no ámbito do seu territorio, dos servizos de promoción da autonomía persoal e de atención ás persoas en situación de dependencia, así como xestionar os recursos necesarios para iso. Así mesmo, o artigo 12 prevé que as entidades locais participarán na xestión dos servizos de atención ás persoas en situación de dependencia de acordo coa normativa das súas respectivas comunidades autónomas e dentro das competencias que a lexislación vixente lles atribúe.

O preámbulo da propia Lei recoñece, tamén, que as necesidades das persoas dependentes foron atendidas, fundamentalmente, desde os ámbitos autonómico e local, polo que a colaboración entre as comunidades autónomas e as entidades

locais é determinante para a atención ás persoas en situación de dependencia e para lograr unha mellor xestión dos servizos, conforme ás competencias que a lexislación vixente lle atribúe.

O artigo 27 do Estatuto de Autonomía de Galicia, no seu apartado 23, atribúelle á Comunidade Autónoma, con carácter exclusivo, competencias en materia de asistencia social.

Con base á referida atribución competencial aprobouse a Lei 13/2008, do 3 de decembro, de servizos sociais de Galicia, que ten por obxecto estruturar e regular, como servizo público, os servizos sociais en Galicia.

Os poderes públicos galegos garanten como dereito recoñecible e esixible o dereito das persoas aos servizos sociais que lles correspondan en función da valoración obxectiva das súas necesidades, a fin de posibilitar que a súa liberdade e igualdade sexan reais e efectivas, removendo os obstáculos que impiden ou dificultan a súa plenitude e facilitando a participación de todas e todos na vida política, económica, cultural e social.

En desenvolvemento da Lei 39/2006, do 14 de decembro, publicouse o Decreto 176/2007, do 6 de setembro, polo que se regula o procedemento para o recoñecemento da situación de dependencia e do dereito ás prestacións do sistema para a autonomía e atención á dependencia na Comunidade Autónoma de Galicia.

Posteriormente publicouse o Decreto 15/2010, do 4 de febreiro, polo que se regula o procedemento para o recoñecemento da situación de dependencia e do dereito ás prestacións do sistema para a autonomía e atención á dependencia, o procedemento para a elaboración do Programa Individual de Atención e a organización e funcionamento dos órganos técnicos competentes. A través do Decreto 15/2010, do 4 de febreiro, que deixou sen vixencia o citado Decreto 176/2007, do 6 de setembro, avanzouse no desenvolvemento da atención e prevención da situación de dependencia e na consolidación dos dereitos das persoas en situación de dependencia, así como de todas aquelas persoas que xa eran usuarias do Sistema Galego de Servizos Sociais con anterioridade á entrada en vigor da normativa específica en materia de dependencia.

A través do Decreto 110/2020, do 6 de setembro, establécese a estrutura orgánica da Xunta de Galicia, e, posteriormente, a través do Decreto 130/2020, do 17 de setembro, fíxase a estrutura orgánica das vicepresidencias e das consellerías da Xunta de Galicia. Correspóndelle á Consellería de Política Social, entre outras, as competencias en materia de promoción da autonomía persoal e atención ás persoas en situación de dependencia, integrándose dentro da súa estrutura orgánica, aprobada mediante Decreto 216/2020, do 3 de decembro, a Dirección

Xeral de Atención Integral Sociosanitaria, que se encargará a través da Subdirección Xeral da Dependencia e Valoración da Discapacidade da coordinación e apoio as xefaturas territoriais nos procedementos de acceso ao recoñecemento de grao de dependencia e na elaboración dos correspondentes programas individuais de atención, en aplicación da Lei 39/2006, do 14 de decembro.

Neste sentido, á vista da evolución da implantación do sistema de atención á dependencia na Comunidade Autónoma e das súas dificultades, a presente disposición, a proposta da Consellería de Política Social, ten por obxecto avanzar no desenvolvemento da atención e prevención da situación de dependencia en aras de garantir unha maior axilidade e eficacia nos procedementos de valoración da dependencia e da elaboración do Programa Individual de Atención, establecéndose un único procedemento, máis áxil e cunha menor carga burocrática que permita dar unha resposta máis rápida ás demandas da sociedade galega en materia de dependencia. Por tales motivos faise precisa unha modificación substancial da actual regulación do procedemento que conleva a derogación da actual norma que o regula.

O presente decreto consta de 44 artigos, agrupados nun título preliminar, tres títulos, tres disposicións adicionais, dúas disposicións transitorias, unha disposición derogatoria e tres disposicións finais.

O título preliminar conta con dous capítulos, o capítulo I contén as disposicións xerais para a aplicación da norma, tales como obxecto e ámbito de aplicación; persoas beneficiarias; catálogo de servizos e prestacións económicas; competencias das distintas administracións públicas, destacando a participación no desenvolvemento da Lei das entidades locais; e faise fincapé no seguimento das prestacións e axudas concedidas. Tamén regula, no seu capítulo II, os órganos do Sistema para a Promoción e Atención á Dependencia en Galicia.

O título I establece os trámites para o recoñecemento da situación de dependencia e a elaboración do Programa Individual de Atención.

O capítulo I diseña un único procedemento para o recoñecemento da situación da dependencia e a elaboración do Programa Individual de Atención. O procedemento iníciase a instancia da persoa interesada ou, no seu caso, de quen exerza a súa representación, reducíndose considerablemente a documentación para presentar coa solicitude e potenciándose a comprobación de datos por parte da Administración, na liña de facilitar a súa resolución coa maior axilidade posible, sen ter que reclamar a intervención da persoa interesada máis que naquilo que sexa estritamente necesario. Desta maneira evítase unha excesiva burocratización, co fin de dar unha resposta máis áxil ás persoas interesadas. Mantense a regulación do procedemento de emerxencia prevista na normativa anterior e establécese o prazo

máximo de seis meses para ditar e notificar a resolución, entendéndose desestimada a solicitude ao vencemento do devandito prazo sen notificarse a resolución.

No capítulo II regúlase a revisión do grao de dependencia e do Programa Individual de Atención. A revisión do grao de dependencia estará condicionada ás causas establecidas no artigo 30 da Lei 39/2006, do 14 de decembro, e na súa normativa de desenvolvemento. O procedemento de revisión iníciase de oficio ou a solicitude da persoa interesada ou, no seu caso, de quen exerza a súa representación, sendo de aplicación ao mesmo as normas establecidas para o recoñecemento da situación de dependencia.

O Programa Individual de Atención poderase revisar de oficio ou a solicitude da persoa interesada ou, no seu caso, de quen exerza a súa representación, sendo de aplicación ao procedemento de revisión as normas establecidas para a elaboración do Programa Individual de Atención.

No título II regúlase a xestión das prazas dos servizos. O programa de asignación de recursos é o instrumento a través do cal se asignan os recursos aplicando os criterios de prioridade que se prevén na norma. A asignación de prazas vacantes a persoas incluídas no programa de asignación de recursos en centros do sistema galego de servizos sociais será efectuada polo órgano superior competente en materia de admisión nos centros e servizos para as persoas en situación de dependencia. No caso do servizo de axuda no fogar, serán os concellos titulares do servizo os que darán de alta ás persoas en espera de acordo coa orde de prelación establecida no programa de asignación de recursos. Para estes efectos garantirase aos servizos sociais comunitarios municipais acceso actualizado ao devandito programa de asignación de recursos.

No título III, dividido en tres capítulos, regúlase o pago e a xustificación das prestacións económicas, o procedemento para o reintegro das cantidades percibidas indebidamente e a devolución dos ingresos indebidos, para os efectos dun seguimento e control exhaustivo das prestacións concedidas e na procura e detección de posibles actuacións fraudulentas. Ao mesmo tempo, regúlase un procedemento de reintegro a través de descontos nas prestacións para facilitar a devolución do percibido indebidamente.

Entre as disposicións cabe destacar a disposición transitoria primeira, onde se establece a aplicación desta norma aos expedientes xa iniciados, conservándose os trámites realizados, co obxecto de que se beneficien das melloras introducidas.

Por último, na disposición final primeira regúlase o establecemento de procedementos de coordinación sociosanitaria, en conexión coa recente creación da comisión para o mesmo fin.

Todos estes cambios buscan optimizar recursos e axilizar o proceso para procurar unha pronta resposta á cidadanía. Co obxecto de contar coa participación dos colectivos directamente afectados, tivéronse en conta as súas alegacións ao mesmo a través do trámite de audiencia correspondente.

De acordo co que establece o artigo 129.1 da Lei 39/2015, do 1 de outubro, do procedemento administrativo común das administracións públicas, a tramitación desta disposición axústase ao cumprimento dos principios de necesidade, eficacia, proporcionalidade, seguridade xurídica, transparencia e eficiencia. A súa tramitación vén precedida da consulta á cidadanía e durante a instrución deuse audiencia e información ás entidades que puideren resultar afectadas por ela. Así mesmo, solicitáronse os informes preceptivos en cumprimento do disposto na Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Na virtude do exposto anteriormente, e facendo uso das facultades que me confire a Lei 1/1983, do 22 de febreiro, de normas reguladoras da Xunta e da súa Presidencia, a proposta da Conselleira de Política Social, oído o Consello Consultivo de Galicia e previa deliberación do Consello da Xunta de Galicia, na súa reunión do día _____,

DISPOÑO:

TÍTULO PRELIMINAR

CAPÍTULO I

Disposicións xerais

Artigo 1. Obxecto e ámbito de aplicación

1. Este decreto ten por obxecto regular o procedemento para o recoñecemento da situación de dependencia e para a elaboración do Programa Individual de Atención no que se recoñecen os servizos de atención e/ou as prestacións económicas, de acordo co establecido nos capítulos III e IV do título I da Lei 39/2006, do 14 de decembro, de promoción da autonomía persoal e atención ás persoas en situación de dependencia, así como determinar os órganos técnicos competentes para a valoración e o asesoramento da dependencia e a coordinación destes, así como a súa composición e funcións.

2. O ámbito de aplicación deste decreto esténdese a todo o territorio da Comunidade Autónoma de Galicia.

Artigo 2. Persoas titulares do dereito

1. Poderán solicitar o recoñecemento da situación de dependencia as persoas con nacionalidade española que, de conformidade co previsto no artigo 5 da Lei 39/2006, do 14 de decembro, cumpran os seguintes requisitos:

- a) Atoparse en situación de dependencia nalgún dos graos establecidos.
- b) Para as persoas menores de tres anos, atoparse en situación de dependencia conforme ao disposto na disposición adicional décimo terceira da Lei 39/2006, do 14 de decembro.
- c) Residir en territorio español e telo feito durante cinco anos, dos cales dous deberán ser inmediatamente anteriores á data de presentación da solicitude. Para os/as menores de cinco anos o período de residencia esixírase a quen exerza a súa garda e custodia.

2. Así mesmo, será necesario que a persoa solicitante resida na Comunidade Autónoma de Galicia na data da presentación da solicitude.

3. As persoas que, reunindo os requisitos dispostos no número anterior, carezan de nacionalidade española ou non sexan nacionais de Estados membros da Unión Europea, rexeranse polo establecido na Lei Orgánica 4/2000, do 11 de xaneiro, sobre dereitos e liberdades dos estranxeiros en España e a súa integración social, nos tratados internacionais e nos convenios que se establezan co país de orixe. Aos/as menores de idade que carezan da nacionalidade española aplicaráselles o disposto nas leis do/da menor vixentes, tanto no ámbito estatal como no autonómico, así como nos tratados internacionais.

4. As persoas persoas solicitantes que, como consecuencia da súa condición de emigrantes retornados, non cumpran o requisito do período de residencia no territorio español, poderán acceder aos servizos e ás prestacións económicas con igual contido e extensión que as prestacións reguladas na Lei 39/2006, do 14 de decembro, e na súa posterior normativa de desenvolvemento.

Artigo 3. Catálogo de servizos do Sistema para a Autonomía e Atención á Dependencia

1. De conformidade co establecido no artigo 15 da Lei 39/2006, do 14 de decembro, o Sistema para a Autonomía e Atención á Dependencia está configurado na Comunidade Autónoma de Galicia polo seguinte catálogo de servizos, segundo a prioridade que se fixe no Programa Individual de Atención en función do disposto nos artigos 25 e seguintes e na posterior normativa de desenvolvemento:

- a) Servizos de prevención das situacións de dependencia e de promoción da autonomía persoal.
 - b) Servizo de Teleasistencia.
 - c) Servizo de Axuda no Fogar.
 - 1º. Atención das necesidades do fogar.
 - 2º. Coidados personais.
 - d) Servizo de centro de atención diúrna e de atención nocturna para persoas en situación de dependencia:
 - 1º. Centro de Día para maiores.
 - 2º. Centro de Día para menores de 65 anos.
 - 3º. Centro de Día de atención especializada.
 - 4º. Centro de Noite.
 - e) Servizo de Atención Residencial:
 - 1º. Residencia de persoas maiores en situación de dependencia.
 - 2º. Centro de atención a persoas en situación de dependencia, en razón dos distintos tipos de discapacidade.
 - 3º. Estadías temporais en residencia.
2. Os centros e servizos citados estarán suxeitos ao previsto na normativa vixente da Comunidade Autónoma de Galicia que regule a calidade, condicións e réxime de prestación dos servizos.

Artigo 4. Prestacións económicas do Sistema para a Autonomía e Atención á Dependencia na Comunidade Autónoma de Galicia

De conformidade co establecido nos artigos 14, 17 a 20 da Lei 39/2006, do 14 de decembro, as prestacións económicas do Sistema para a Autonomía e Atención á Dependencia na Comunidade Autónoma de Galicia, serán as que a continuación se enumeran, segundo a prioridade e contías que se fixen no Programa Individual de Atención en función do disposto nos artigos 25 e seguintes e na posterior normativa de desenvolvemento:

- a) A prestación económica vinculada ao servizo como achega económica de carácter periódico que ten por finalidade contribuír ao financiamento do custo dos servizos que se determinen no Programa Individual de Atención como os máis adecuados para a persoa en situación de dependencia e sexan prestados por entidades debidamente autorizadas para a atención á dependencia, cando non sexa posible o acceso efectivo a un servizo público, ou cando así o solicite a persoa interesada.



b) A prestación económica para coidados na contorna familiar como achega económica de carácter periódico, cuxa finalidade é proporcionarlle á persoa beneficiaria recursos económicos para contribuír á cobertura dos gastos derivados da atención prestada pola persoa coidadora non profesional ao obxecto de posibilitar a permanencia da persoa beneficiaria no seu domicilio habitual, sempre que o Programa Individual de Atención determine esta modalidade de intervención como a máis adecuada entre as do catálogo de prestacións, tendo en conta o grao de dependencia recoñecido e as necesidades de atención da persoa en situación de dependencia.

c) A prestación económica de asistencia persoal como achega económica destinada a contribuír á cobertura dos gastos derivados da contratación dun/unha asistente persoal que facilite o acceso a un proxecto formativo, laboral ou ocupacional para promover unha maior autonomía no exercicio das actividades da vida diaria ás persoas en situación de dependencia en calquera dos seus graos.

Artigo 5. Integración no Sistema Galego de Servizos Sociais

1. A Comunidade Autónoma de Galicia, no ámbito das súas competencias e de conformidade co disposto na Lei 13/2008, do 3 de decembro, de servizos sociais de Galicia, garante a oferta de servizos e prestacións económicas recollidas na Lei 39/2006, do 14 de decembro, integrándoas no Sistema Galego de Servizos Sociais.

2. De conformidade co artigo 14 da Lei 39/2006, do 14 de decembro, os servizos do catálogo terán carácter prioritario e prestaranse a través da oferta pública da rede de servizos sociais pola Comunidade Autónoma mediante centros e servizos públicos ou privados concertados debidamente acreditados.

De non ser posible a atención mediante algún destes servizos procederá o recoñecemento da prestación económica vinculada ao servizo. Esta prestación irá destinada á cobertura dos gastos do/s servizo/s previstos no Programa Individual de Atención, debendo ser prestado/s por unha entidade ou centro acreditado para a atención á dependencia.

Artigo 6. Competencias das administracións públicas

1. Correspóndelle ao órgano territorial da consellería competente en materia de servizos sociais o recoñecemento da situación de dependencia e, no seu caso, do dereito e acceso aos servizos e prestacións económicas do Sistema para a Autonomía e Atención á Dependencia.

2. As entidades locais de Galicia participarán na xestión dos servizos de atención ás persoas en situación de dependencia nos termos previstos na Lei 39/2006, do 14 de

decembro, e na Lei 13/2008, do 3 de decembro, de servizos sociais de Galicia, no marco das competencias que a lexislación vixente lles atribúan.

3. A efectos deste decreto, as administracións públicas, no exercicio das súas respectivas competencias, actuarán de conformidade cos principios de coordinación, colaboración e cooperación interadministrativa.

Artigo 7. Seguimento das prestacións, axudas e beneficios e acción administrativa contra a fraude

1. A Administración xeral da Comunidade Autónoma de Galicia, a través da consellería competente en materia de servizos sociais e os servizos sociais comunitarios correspondentes ao domicilio da persoa beneficiaria, velarán pola correcta aplicación ou utilización dos fondos públicos, prestacións, servizos e cantos beneficios se deriven do Sistema para a Autonomía e Atención á dependencia na Comunidade Autónoma de Galicia.

2. A traballadora ou traballador social dos servizos sociais comunitarios correspondentes ao domicilio da persoa beneficiaria serán os responsables do seguimento da correcta aplicación do Programa Individual de Atención no seu ámbito territorial e da adecuación á situación da persoa beneficiaria.

3. A Administración autonómica exercerá as súas facultades inspectoras sobre as entidades, centros, servizos e programas, tanto públicos como privados, e das prestacións económicas recoñecidas, a través da consellería competente en materia de servizos sociais, coa finalidade de verificar o estrito cumprimento da normativa de aplicación nesta materia, de forma que se garantan os dereitos das persoas usuarias e se procure a mellora continua da calidade nos servizos sociais que se presten.

4. A persoa beneficiaria está obrigada a comunicar calquera variación das circunstancias que foron determinantes para a resolución do seu expediente.

CAPÍTULO II

Órganos do Sistema para a Autonomía e Atención á Dependencia en Galicia

Artigo 8. Órganos de valoración e asesoramento da dependencia. Distribución territorial e composición

1. Os órganos de valoración e asesoramento da dependencia, órganos colexiados, estarán adscritos ao correspondente órgano territorial da consellería con competencia en materia de servizos sociais ou á subdirección xeral con competencia en materia de valoración da dependencia.

2. Existirá, como mínimo, un órgano de valoración e asesoramento da dependencia por cada unha das áreas de valoración provinciais adscritas aos órganos territoriais.

Por cada órgano territorial existirá, como mínimo, unha área de valoración correspondente ao ámbito provincial respectivo, podéndose, se é necesario, establecer varias áreas de valoración provinciais.

3. Cada órgano de valoración estará integrado por profesionais con perfil social e sanitario, cunha composición mínima dun/dunha profesional médico, un/unha psicólogo/a, un/unha traballador/a social e, no seu caso, dun/dunha terapeuta ocupacional ou fisioterapeuta.

4. En canto á organización e réxime de funcionamento seguirase o disposto e na sección 3ª, Capítulo I do Título I da lei 16/2010, do 17 de decembro, de organización de funcionamento da administración xeral e do sector público autonómico de Galicia, na sección 3ª, Capítulo II do título preliminar da Lei 40/2015, do 1 de outubro, de réxime xurídico do sector público, que sexa de aplicación.

Artigo 9. Funcións dos órganos de valoración e asesoramento da dependencia

Serán funcións dos órganos de valoración e asesoramento da dependencia:

- a) Revisar a información sanitaria, o informe social no seu caso e a restante documentación que obre no expediente ou calquera outra información complementaria e necesaria para os efectos de desenvolver a valoración.
- b) Solicitar a documentación, informes ou probas complementarias necesarias para a valoración da situación de dependencia e o establecemento do Programa Individual de Atención.
- c) Coordinar as actuacións do persoal técnico de valoración da situación da dependencia para garantir e unificar os criterios técnicos entre profesionais da mesma.
- d) Revisar e aplicar un control de calidade ás valoracións da dependencia realizadas polo persoal técnico de valoración da Administración autonómica.
- e) Codificar os diagnósticos que se detallen no ditame técnico de valoración.
- f) Proponer ditame sobre o grao de dependencia e, no seu caso, proposta do Programa Individual de Atención á persoa titular do órgano territorial da consellería competente en materia de servizos sociais.
- g) Emitir proposta técnica que motive a necesidade de proceder nos casos de emerxencia.

h) Asesorar ao persoal técnico de valoración da situación de dependencia nos asuntos da súa competencia.

i) Emitir aqueles informes que se lles soliciten polas administracións públicas en materia de valoración da situación de dependencia, así como do Programa Individual de Atención.

j) Aqueloutras funcións que lles sexan atribuídas no ámbito do asesoramento e avaliación.

Artigo 10. Persoal técnico de valoración da situación de dependencia

1. O persoal técnico de valoración da dependencia dependerá funcionalmente dos órganos de valoración e asesoramento da dependencia e organicamente do órgano territorial da consellería con competencias en materia de servizos sociais ou, no seu caso, da subdirección xeral con competencia en materia de valoración da dependencia.

2. O persoal técnico de valoración da dependencia serán profesionais con perfil social e sanitario de conformidade co establecido na normativa de desenvolvemento deste decreto.

Artigo 11. *Funcións do persoal técnico de valoración*

Serán funcións dos técnicos de valoración da situación de dependencia:

a) Aplicar os baremos para a valoración da dependencia establecidos normativamente.

b) Examinar a situación socioeconómica de acordo co informe social e o resto de documentación relativa á contorna na que vive a persoa solicitante, e no seu caso, a súa elaboración.

c) Dar traslado ao Órgano de Valoración e Asesoramento da Dependencia da necesidade de solicitar informes e/ou probas complementarias necesarias para cubrir a valoración, así como da existencia de causas no expediente que requiran a súa valoración para determinar o carácter de emerxencia.

d) A análise das modalidades do recursos que, dentro do catálogo de servizos e prestacións se adecúen ás necesidades de cada solicitante.

e) Orientar e asesorar ás persoas usuarias do Sistema para a Autonomía e Atención á Dependencia.

f) Aqueloutras funcións que lles sexan atribuídas.

Artigo 12. Unidade de Coordinación da Dependencia

1. A Unidade de Coordinación da Dependencia, órgano de carácter técnico, estará adscrita ao órgano de dirección competente en materia de dependencia con relación xerárquica directa coa persoa titular da consellería.
2. A Unidade de Coordinación da Dependencia estará integrada como mínimo por un/unha profesional médico, un/unha psicólogo/a, un/unha traballador/a social e, no seu caso, por un/unha terapeuta ocupacional ou fisioterapeuta.

Artigo 13. Funcións da Unidade de Coordinación da Dependencia

Serán funcións da Unidade de Coordinación da Dependencia:

- a) Establecer, unificar e informar dos criterios xerais para a correcta aplicación dos baremos para a valoración da dependencia establecidos normativamente, así como no referido ao establecemento e elaboración do Programa Individual de Atención.
- b) Prestar asesoramento nas reclamacións e asistencia técnica nos recursos e procedementos contenciosos nos que sexa parte a Administración autonómica en materia de valoración da situación de dependencia e dos programas individuais de atención.
- c) Prestar asistencia técnica de coordinación e seguimento das valoracións da situación de dependencia e do establecemento dos correspondentes programas individuais de atención, así como nos sistemas de información do Sistema para a Autonomía e Atención á Dependencia.
- d) Garantir o seguimento e a calidade da información compartida entre os sistemas de información da Comunidade Autónoma de Galicia e o Sistema de Información de Atención á Dependencia do Estado (SISAAD).
- e) Coordinar o recoñecemento dos servizos establecidos nas resolucións do Programa Individual de Atención coas unidades administrativas competentes en materia de adxudicacións de prazas e prestación dos servizos.
- f) Coordinar os plans de formación dos profesionais dos órganos de valoración e asesoramento e do persoal técnico, así como doutros profesionais da rede pública que poidan intervir nos procedementos regulados no presente Decreto.
- g) Aqueloutras cuestións que lle atribúa o órgano de dirección competente en materia de dependencia con relación xerárquica directa coa persoa titular da consellería ou aqueloutras que lle sexan atribuídas en aplicación da normativa vixente.

TÍTULO I

Recoñecemento da situación de dependencia e elaboración do Programa Individual de Atención

CAPÍTULO I

Procedemento para o recoñecemento da situación de dependencia e para a elaboración do Programa Individual de Atención

Sección 1ª. Iniciación

Artigo 14. Iniciación do procedemento e presentación da solicitude

1. O procedemento iniciarase a instancia da persoa que poida estar afectada por algún grao de dependencia ou, no seu caso, de quen exerza a súa representación.

2. As solicitudes presentaranse preferiblemente por vía electrónica a través do formulario normalizado dispoñible na sede electrónica da Xunta de Galicia, <https://sede.xunta.gal>.

Opcionalmente, poderanse presentar presencialmente en calquera dos lugares e rexistros establecidos na normativa reguladora do procedemento administrativo común.

Para a presentación electrónica poderá empregarse calquera dos mecanismos de identificación e firma admitidos pola sede electrónica da Xunta de Galicia, incluído o sistema de usuario e clave Chave365.

3. As persoas que tivesen recoñecida a necesidade de axuda de terceira persoa, cunha puntuación de 45 puntos ou máis, de conformidade co Real decreto 1971/1999, do 23 de decembro, do Procedemento para o Recoñecemento, Declaración e Cualificación do Grao de Discapacidade poderán presentar solicitude de homologación á dependencia de conformidade co que se estableza na orde de desenvolvemento do decreto.

Artigo 15. Documentación complementaria

1. As persoas interesadas deberán presentar coa solicitude a seguinte documentación:

a) Informe social, segundo o que se estableza na orde de desenvolvemento do presente decreto.

b) Informe médico, segundo o que se estableza na orde de desenvolvemento do presente decreto.

c) Certificacións bancarias de saldos, depósitos, valores e contas da persoa solicitante.

d) Certificación de pensións do estranxeiro ou outras prestacións de carácter social, calquera que sexa o seu réxime (MUFACE, ISFAS, MUGEJU, etc) da persoa solicitante, ou declaración responsable de non percibir as ditas prestacións.

De conformidade co artigo 28.3 da Lei 39/2015, do 1 de outubro, do procedemento administrativo común das Administracións Públicas, non será necesario presentar os documentos que xa foron presentados anteriormente pola persoa interesada ante calquera Administración.

Neste caso, a persoa interesada deberá indicar en que momento e ante que órgano administrativo presentou os citados documentos, que serán solicitados electronicamente a través das redes corporativas ou mediante consulta ás plataformas de intermediación de datos ou outros sistemas electrónicos habilitados para o efecto, agás que conste no procedemento a oposición expresa da persoa interesada.

De forma excepcional, se non se puideron obter os citados documentos, poderá solicitarse novamente á persoa interesada a súa presentación.

2. No caso da prestación económica vinculada ao servizo, da prestación económica de asistencia persoal e da prestación económica de coidados na contorna familiar presentarase, ademais, orixinal ou copia do certificado onde conste o código IBAN da conta bancaria na que figure a persoa en situación de dependencia e, no seu caso, a persoa representante, como persoa titular.

3. No caso da prestación económica de asistencia persoal presentarase, ademais, a seguinte documentación:

a) Orixinal ou copia do certificado onde conste o código IBAN da conta bancaria na que figure a persoa en situación de dependencia e, no seu caso, a persoa representante, como persoa titular.

b) No seu caso, orixinal ou copia cotexada do certificado de residencia legal en España do asistente persoal.

4. A documentación complementaria presentarase preferiblemente por vía electrónica.

Opcionalmente, as persoas interesadas poderán presentar a documentación complementaria presencialmente en calquera dos lugares e rexistros establecidos na normativa reguladora do procedemento administrativo común.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento

o esixa ou existan dúbidas derivadas da calidade da copia, a Administración poderá solicitar de maneira motivada o cotexo das copias presentadas pola persoa interesada, para o que poderán requirir a exhibición do documento ou da información orixinal.

5. Sempre que se realice a presentación de documentos separadamente da solicitude deberase indicar o código e o órgano responsable do procedemento, o número de rexistro de entrada da solicitude e o número de expediente se se dispón del.

Artigo 16. *Comprobación de datos*

1. Para a tramitación deste procedemento consultarase automaticamente os datos incluídos nos seguintes documentos en poder da Administración actuante ou elaborados polas Administracións públicas agás que a persoa interesada ou no seu caso, a persoa representante, se opoña á súa consulta:

- a) Grao de dependencia.
- b) Grao de discapacidade.
- c) Datos de residencia con data de última variación padroal.
- d) Datos de residencia legal de persoas solicitantes estranxeiras.
- e) Datos catastrais.
- f) Datos relativos ao rexistro como demandante de emprego.
- g) Prestacións do Rexistro de Prestacións Sociais Públicas, Incapacidade Temporal e Maternidade.
- h) Declaración do IRPF.
- i) Historia Social Única.
- j) Historia Clínica do Servizo Galego de Saúde.
- k) Certificado de defunción.

2. No caso de que as persoas interesadas se opoñan á consulta, deberán indicalo no recadro correspondente habilitado no formulario correspondente e presentar os documentos.

Cando así o esixa a normativa aplicable solicitarase o consentimento expreso da persoa interesada para realizar a consulta.

3. Excepcionalmente, no caso de que algunha circunstancia imposibilitase a obtención dos citados datos, poderase solicitar ás persoas interesadas a presentación dos documentos correspondentes.

Artigo 17. *Emenda de solicitudes*

Se a solicitude non reunise os requisitos esixidos ou non se acompañase da documentación necesaria, segundo se establece no artigo 15, requirirase á persoa interesada para que, no prazo de dez días hábiles, emende a falta ou acompañe a

documentación preceptiva, con indicación de que, se así non o fixese, teráselle por desistida da súa petición, de conformidade co establecido no artigo 68 da Lei 39/2015, do 1 de outubro, previa resolución que deberá ser ditada nos termos previstos no artigo 21 do mencionado texto legal.

Artigo 18. Verificación dos datos achegados. Réxime de infraccións e sancións

1. A Administración terá, en todo momento, a facultade de verificar os datos achegados polas persoas interesadas. A ocultación ou falsificación de datos ou informacións que deban figurar na solicitude ou nos documentos que a acompañan, poderá ser considerada causa suficiente para denegar o recoñecemento da situación de dependencia, sen prexuízo do disposto no título III da Lei 39/2006, do 14 de decembro, que regula as condicións básicas de acceso ao Sistema para a Autonomía e Atención á Dependencia.

2. O incumprimento das obrigacións e requisitos da persoa beneficiaria establecidas no presente decreto quedará sometido ao réxime de infraccións e sancións regulado no título III da Lei 39/2006, do 14 de decembro, e, cando proceda, ao réxime de infraccións e sancións disposto nos títulos X e XI da Lei 13/2008, do 3 de decembro.

3. En todo caso, a sanción que leve consigo a perda da prestación económica implicará o reintegro das cantidades percibidas indebidamente e a esixencia do interese de demora correspondente desde o momento do pago da prestación ata a data na que se acorde a procedencia do reintegro, segundo o procedemento disposto no título III.

Sección 2ª. Ordenación e instrución

Artigo 19. Instrución do procedemento

1. A instrución do procedemento correspóndelle ao departamento competente en materia de dependencia e autonomía persoal, de acordo co previsto no decreto de estrutura orgánica da consellería con competencia en materia de servizos sociais.

Artigo 20. Orde de prelación na tramitación dos procedementos

1. Os procedementos iniciaranse por orde de entrada.

Cando o órgano instrutor entenda que existen razóns de interese público, obxectivamente motivadas de conformidade co disposto no artigo 21, poderá alterar esta orde.

2. Á vista dos informes social e de saúde o órgano instrutor, previo ditame técnico

do Órgano de Valoración e Asesoramento da Dependencia, poderá determinar a orde de prelación dos expedientes na súa valoración da situación de dependencia.

3. Debido ás características específicas do recoñecemento da situación de dependencia das persoas menores de tres anos, establécese a prioridade na tramitación destes procedementos para evitar a demora e interferencia nos prazos de revisión.

Artigo 21. Tramitación dos procedementos nos supostos de emerxencia social

Daráselle prioridade na tramitación ao correspondente procedemento, mediante resolución motivada da persoa titular do departamento territorial da consellería competente en materia de servizos sociais e previo ditametécnico do Órgano de Valoración e Asesoramento da Dependencia, unha vez analizado o informe social e de saúde que acrediten estas circunstancias, cando así o aconsellen razóns de interese público debidamente documentadas e obxectivadas que conleven:

- a) Unha situación de desamparo ou abandono.
- b) Malos tratos físicos e/ou psíquicos.
- c) Situación de risco grave inminente para a súa integridade física e/ou psíquica.

Artigo 22. Citación para a valoración da situación de dependencia

1. O servizo ou órgano que determine a consellería con competencia en materia de servizos sociais, unha vez completada a documentación, comunicará á persoa interesada o día, a franxa horaria e o lugar en que se realizará a valoración da situación de dependencia.

2. Cando a persoa interesada mostre a súa conformidade na solicitude e as circunstancias técnicas o fagan posible, poderá ser citado por medios telemáticos ou electrónicos.

3. Cando se produza a paralización do procedemento, por causa imputable a persoa interesada que impida realizar a valoración á que se refire o número anterior, advertiráselle que transcorridos tres meses producirase a caducidade do mesmo e o arquivo das actuacións practicadas, de acordo co establecido no artigo 95 da Lei 39/2015, do 1 de outubro, salvo causa de forza maior debidamente acreditada.

4. Se no momento da citación existisen condicións de saúde obxectivamente motivadas que impidan a aplicación dos baremos de valoración da dependencia establecidos normativamente, suspenderase a tramitación do expediente ata que se dean as circunstancias que posibiliten a valoración e así o inste a persoa interesada.

Artigo 23. Requirimento de documentación

1. O órgano instrutor requirirá, de ser o caso, a persoa interesada para que o achegue, no prazo máximo de 10 días hábiles desde o día seguinte á notificación do requirimento, a documentación necesaria e complementaria que non obre xa en poder da Administración para a valoración da situación de dependencia e a elaboración do Programa Individual de Atención. Se non o fixese, terase por interrompido o cómputo do prazo para resolver e notificar a resolución.
2. Transcorrido o prazo de tres meses sen que a persoa solicitante achegue a documentación requirida, a Administración declarará a caducidade do procedemento e acordará o arquivo das actuacións de acordo co establecido no artigo 95 da Lei 39/2015, do 1 de outubro.

Artigo 24. Valoración da situación de dependencia

1. A aplicación dos baremos establecidos normativamente, aprobados mediante Real decreto, corresponderalle ao persoal técnico de valoración de conformidade co disposto nos artigos 10 e 11 deste decreto.
2. A aplicación dos baremos establecidos normativamente realizarase na contorna habitual da persoa solicitante, salvo que os órganos de valoración e asesoramento da dependencia determinen que se leve a cabo nun lugar distinto.
3. O/a profesional técnico respectivo informará á persoa solicitante ou, no seu caso á persoa representante, das situacións orixinadas por problemas de saúde especificadas no informe médico, así como das necesidades de apoio doutra persoa para a realización de actividades ou tarefas tidas en conta tras a aplicación do baremo.
4. Corresponderá ao persoal técnico de valoración examinar a situación socioeconómica así como o estudo sobre a contorna no que vive a persoa en situación de dependencia.
5. Os órganos de valoración e asesoramento da dependencia realizarán de oficio cantas actuacións resulten necesarias para a determinación, coñecemento e comprobación dos datos en virtude dos cales deba ditarse resolución. Poderán solicitar ou requirir os informes e/ou probas complementarias ou aclaratorias que consideren convenientes, cando o contido dos antecedentes que figuran no procedemento ou as especiais circunstancias da persoa interesada así o aconsellen.

Artigo 25. Ditame proposta sobre o grao de dependencia e o Programa de Individual de Atención.

1. Os órganos de valoración e asesoramento da dependencia realizarán a valoración integral, tendo en conta os resultados da aplicación polo persoal técnico dos baremos de valoración de dependencia establecidos normativamente, o exame das condicións de saúde reflectidos nos informes, o informe social correspondente ao expediente de SAAD e outros informes sociais de que se dispoña, e emitirá ditame proposta que conterá como mínimo:

a) diagnóstico, puntuación do baremo, o grao de dependencia.

b) carácter permanente ou revisable do grao de dependencia de acordo ao seguinte:

1º. No caso de menores de 3 anos a valoración terá carácter non permanente, establecéndose revisións de oficio periódicas cando os/as menores cumpran 6, 12, 18, 24 e 30 meses. Aos 36 meses todos os/as menores deberán ser de novo avaliados/as co baremo recoñecido normativamente aplicable para a súa idade.

2º. No caso de menores de 3 a 18 anos, estableceranse revisións de oficio, como mínimo, unha revisión por cada tramo de idade no que se divide o baremo segundo os criterios establecidos no Real decreto 174/2011, do 11 de febreiro, polo que se aproba o baremo de valoración da situación de dependencia establecido pola Lei 39/2006, do 14 de decembro, de promoción da autonomía persoal e atención ás persoas en situación de dependencia.

3º. Nos demais casos, establecerase un prazo máximo no que se deberá efectuar a primeira revisión do grao resolto cando sexa necesario, en función das circunstancias concorrentes.

c) A proposta do Programa Individual de Atención, que terá en conta as expectativas ou necesidades de atención a través dos servizos ou das prestacións económicas do sistema para a autonomía e atención á dependencia manifestadas pola persoa interesada.

Esta consulta terá carácter orientativo para o Órgano de Valoración e Asesoramento da Dependencia, non sendo vinculante para o mesmo.

A proposta do Programa Individual de Atención incluírá o recurso do Sistema para a Autonomía e Atención á Dependencia asignado e, no seu caso, aquel ou aqueles recursos que lle correspondan ao interesado mentres non se produza a efectividade do recurso asignado.

No caso dos servizos indicará a participación da persoa beneficiaria no custo dos mesmos e no caso das prestacións económicas indicará as contías e data e inicio das mesmas.

2. Non será preciso o trámite de audiencia á persoa interesada de conformidade co previsto no artigo 82 da Lei 39/2015, do 1 de outubro, cando non figuren no procedemento nin sexan tidos en conta para a emisión da resolución outros feitos nin outras alegacións e probas que as aducidas pola persoa interesada.

3. Os órganos de valoración e asesoramento da dependencia elevarán á persoa titular do departamento territorial da consellería con competencias en materia de servizos sociais o ditame proposta sobre o grao de dependencia e sobre o Programa de Individual de Atención.

Sección 3ª. Terminación

Artigo 26. Resolución

1. A persoa titular do departamento territorial da consellería con competencias en materia de servizos sociais ditará a correspondente resolución, que determinará o grao de dependencia da persoa solicitante e aprobará o Programa Individual de Atención, co contido establecido no apartado 1 do artigo 25 deste decreto.

2. No suposto en que a modalidade ou modalidades de intervención determinadas sexan distintas á valoración efectuada polo/a traballador/a social dos servizos sociais comunitarios do domicilio do solicitante e, no seu caso, do/da traballador/a social do sistema de saúde ou do/da traballador/a social dos servizos sociais especializados, deberá xustificarse expresamente na resolución a motivación da modalidade de intervención.

3. Nos casos que se determine necesario, en función das circunstancias concorrentes, determinarase o prazo máximo en que se deba efectuar a revisión do grao de dependencia que se declare e/ou do Programa Individual de Atención.

4. O prazo máximo para ditar resolución e para practicar a súa notificación será de seis meses a contar desde a data en que a solicitude tivese entrada no rexistro do órgano competente para a súa tramitación.

Artigo 27. Desistencia e renuncia

1. En calquera fase do procedemento a persoa solicitante ou, no seu caso, quen exerza a súa representación, poderá desistir da súa petición ou ben renunciar aos dereitos recoñecidos nunha resolución previa.

2. A desistencia ou a renuncia formularanse por escrito, por calquera outro medio que permita a súa constancia ou mediante a comparecencia da persoa lexitimada nas dependencias do departamento territorial competente en materia de servizos sociais. Neste último suposto, o órgano competente cubrirá a oportuna dilixencia, que deberá ser asinada pola persoa interesada.

3. Formalizada a desistencia ou a renuncia, archivarase a solicitude e poñerase fin ao expediente de conformidade co disposto no artigo 94 da a Lei 39/2015, do 1 de outubro.

Artigo 28. Efectividade do dereito aos servizos e/ou prestacións económicas

1. A efectividade do dereito ás prestacións económicas producirase a partir do primeiro día do mes seguinte ao da data da resolución na que se recoñeza a concreta prestación económica, e no seu caso, desde o día seguinte á data na que se cumpra o prazo máximo de seis meses desde a solicitude sen que se tivera notificado a resolución expresa de recoñecemento da prestación. Na data de efectividade será necesario que se reúnan os requisitos que se esixan na normativa vixente para cada tipo de prestación. En caso contrario, a efectividade producirase a partir do día primeiro do mes seguinte a que concorran devanditos requisitos.

2. Os efectos económicos do recoñecemento ao dereito ás prestacións económicas produciranse a partir do día primeiro do mes seguinte ao da data da aprobación do Programa Individual de Atención. Con todo, os efectos económicos do recoñecemento ao dereito ás prestacións, de recoñecerse nun prazo superior ao prazo máximo establecido, segundo o disposto no punto primeiro deste artigo, produciranse a partir do día primeiro do mes seguinte a aquel desde o cal se recoñeza a súa efectividade.

Nos supostos de prestación de coidados na contorna familiar abonarase como último pago la mensualidade total correspondente ao mes no que se extinga a prestación por falecemento da persoa beneficiaria ou se produza a súa baixa por calquera outro motivo.

Artigo 29. Silencio administrativo

No suposto do vencemento do prazo máximo establecido sen ditarse resolución expresa, as persoas interesadas poderán entender desestimada a súa solicitude por silencio administrativo, sen prexuízo da obrigaón da Administración de resolver expresamente.

Artigo 30. *Recurso de alzada*

Contra a resolución deste procedemento as persoas interesadas poderán interpoñer, no prazo dun mes desde o día seguinte á súa notificación, recurso de alzada ante a persoa titular da consellería con competencia en materia de servizos sociais, de conformidade co disposto nos artigos 121 e seguintes da Lei 39/2015, do 1 de outubro.

CAPÍTULO II

Revisión do grao de dependencia e do Programa Individual de Atención

Artigo 31. *Revisión do grao de dependencia*

1. O grao de dependencia será revisable polas causas establecidas no artigo 30 da Lei 39/2006, do 14 de decembro, e na súa normativa de desenvolvemento. O procedemento iniciarase a instancia da persoa interesada ou de quen exerza a súa representación, ou de oficio polo órgano do departamento territorial da consellería con competencias en materia de servizos sociais.
2. Se a solicitude de revisión a presenta a persoa interesada deberá de acompañarse dos informes de condicións de saúde e documentos que fundamenten as causas da revisión e dirixirse ao departamento territorial da consellería con competencias en materia de servizos sociais do domicilio da persoa beneficiaria.
3. No caso de que non existan circunstancias debidamente acreditadas e xustificadas que permitan proceder á revisión solicitada, o Órgano de Valoración e Asesoramento emitirá un ditame técnico no que propoñerá a desestimación da solicitude de revisión. O ditame-proposta elevarase á persoa titular do departamento territorial da consellería con competencia en materia de servizos sociais que ditará resolución denegatoria da revisión.
4. Será de aplicación ao procedemento de revisión as normas establecidas no presente decreto para o recoñecemento da situación de dependencia.

Artigo 32. *Revisión do Programa Individual de Atención*

O Programa Individual de Atención poderá ser revisado nos seguintes casos:

1. Revisarao de oficio o órgano do departamento territorial da consellería con competencia en materia de servizos sociais nos seguintes supostos:
 - a) Cando se produza unha revisión do grao de dependencia recoñecido, sempre que esta implique unha modificación das prestacións económicas e/ou servizos recibidos.

b) Polo traslado de residencia á Comunidade Autónoma de Galicia desde outra Comunidade Autónoma.

c) Cando existan circunstancias obxectivamente motivadas que aconsellen a súa revisión.

d) A proposta, debidamente motivada, do/da traballador/a social dos servizos sociais comunitarios do domicilio da persoa beneficiaria, ou de ser o caso do/da traballador/a social do sistema de saúde ou traballador/a social de servizos sociais especializados, responsable do seguimento do Programa Individual de Atención.

2. En calquera caso, revisarase o Programa Individual de Atención coa periodicidade que determine o órgano superior con competencias en materia de dependencia.

3. Poderá revisarse o Programa Individual de Atención a instancia da persoa interesada ou de quen exerza a súa representación, sempre que se acredite unha variación nas condicións de saúde ou na situación da súa contorna que puidesen motivar unha modificación do servizo ou prestación económica recoñecida.

4. Será de aplicación ao procedemento de revisión as normas establecidas no presente decreto para a elaboración do Programa Individual de Atención.

TÍTULO II

Xestión das prazas dos servizos

Artigo 33. O programa de asignación de recursos

1. O programa de asignación de recursos (en adiante PAR) é o instrumento a través do cal a consellería con competencias en materia de servizos sociais establece unha orde de preferencia para o acceso aos centros de día, de noite, residenciais, teleasistencia e axuda no fogar do sistema galego de servizos sociais conforme ao previsto no artigo 26 deste Decreto.

2. O acceso ás listaxes ordenadas de acordo cos criterios de prelación establecidos neste título é público, sen prexuízo das limitacións que se deriven da lexislación vixente sobre o dereito á intimidade e á protección de datos de carácter persoal. Neste sentido, e previa solicitude de quen acredite un interese lexítimo, o órgano superior competente en materia de admisión nos centros e servizos para as persoas en situación de dependencia emitirá certificacións relacionadas co seu contido.

3. O PAR establecerá a prelación mediante a aplicación dos seguintes criterios de prioridade:

- a) O maior grao de dependencia.
- b) A menor capacidade económica.
- c) A situación sociofamiliar da persoa en situación de dependencia.
- d) A non percepción doutra prestación ou servizo do sistema para a promoción da autonomía e atención á dependencia.
- e) A data de presentación da solicitude da valoración da dependencia.
- f) A idade da persoa en situación de dependencia.

4. Atendendo aos criterios expostos nos puntos anteriores, o PAR xerará unha actualización automática da listaxe de espera, a medida que o órgano superior competente en materia de admisión nos centros e servizos para as persoas en situación de dependencia incorpore novas resolucións de Programa Individual de Atención pendentes de asignación de centro ou servizo.

5. As persoas incluídas no PAR poderán comunicar ao órgano superior competente a relación de centros aos que desexen incorporarse, o cal será tido en conta para os efectos previstos no artigo seguinte.

Artigo 34. Asignación de prazas nos centros e servizos

1. A asignación de prazas vacantes a persoas incluídas no PAR en centros do sistema galego de servizos sociais será efectuada polo órgano superior competente en materia de admisión nos centros e servizos para as persoas en situación de dependencia, que aprobará o correspondente ingreso. Tal asignación deberá efectuarse a favor da persoa que se atope mellor situada dentro do PAR, con respecto ao tipo de recurso e vacante de que se trate.

Non obstante o anterior, darase preferencia na asignación de recursos con respecto ao tipo de recurso e vacante de que se trate, excepto nas situacións de emerxencia social reguladas no artigo 21, ao suposto de persoas cuxa atención se veu realizando con recursos do sistema educativo e que, por razón de idade, non poidan permanecer no devandito sistema, sendo necesaria unha continuidade na súa atención a través de recursos do sistema de servizos sociais. A orde de prelación destas persoas entre si virá determinada pola aplicación dos criterios xerais previstos no artigo anterior.

2. A proposta de asignación de praza vacante será elevada ao órgano superior competente en materia de admisión nos centros e servizos para as persoas en situación de dependencia pola unidade administrativa responsable en cada caso, segundo o tipo de centro de que se trate.

3. Mediante resolución o órgano superior competente en materia de admisión nos centros e servizos para as persoas en situación de dependencia asignará unha praza concreta á persoa solicitante, conforme ao establecido no correspondente Programa Individual de Atención, onde se deberá de indicar o centro ou servizo que lle corresponde.

4. Nas situacións de emerxencia social reguladas no artigo 21 e nos supostos nos que por resolución xudicial deba asignarse unha praza, cando non haxa prazas vacantes nun centro da tipoloxía idónea poderase adxudicar de forma temporal unha praza vacante noutro centro.

5. A renuncia á praza de atención residencial asignada non supoñerá a baixa no PAR, salvo manifestación expresa en contrario da persoa solicitante.

Artigo 35. Asignación de prazas vacantes no servizo de axuda no fogar

No caso do servizo de axuda no fogar, os concellos titulares do servizo procederán a dar de alta ás persoas en espera de acordo coa orde de prelación establecida no PAR. Para estes efectos garantirase aos servizos sociais comunitarios municipais acceso actualizado ao devandito PAR.

TÍTULO III

Pago e xustificación das prestacións económicas, procedemento de reintegro das prestacións indebidamente percibidas e devolución de ingresos indebidos

CAPÍTULO I

Pago e xustificación das prestacións económicas

Artigo 36. Pago e xustificación do mantemento do dereito á prestación económica vinculada ao servizo

1. No prazo dun mes desde a notificación da resolución do procedemento referida no artigo 26, a persoa beneficiaria debe acreditar ante o departamento territorial da consellería con competencias en materia de servizos sociais, mediante fotocopia compulsada do orixinal da factura emitida para o efecto ou certificación acreditativa da entidade prestadora do servizo, que efectuou o gasto do servizo ao que se vincula a prestación concedida.

2. O importe da prestación abonarase mensualmente.

3. A persoa beneficiaria, deberá xustificar mensualmente a prestación do servizo. A dita xustificación realizarase mediante a presentación dunha certificación.

4. A persoa beneficiaria, ou quen exerza a súa representación, deberá de comunicar ao departamento territorial da consellería con competencias en materia de servizos sociais, no prazo máximo de trinta días naturais, os cambios relativos ao prestador do servizo, para os efectos de comprobar o cumprimento dos requisitos establecidos no presente decreto e na súa normativa de desenvolvemento. No caso de que o prestador do servizo non cumpra co previsto neste decreto e na súa posterior normativa de desenvolvemento, o departamento territorial da consellería con competencia en materia de servizos sociais interromperá o pago da prestación económica ata que se cumpra o requirido anteriormente.

5. De ser o caso, e se a persoa usuaria presta expresamente o seu consentimento, a achega da certificación acreditativa expedida polo prestador e o duplicado orixinal das facturas, así como do pagamento efectivo destas, poderá ser remitido pola entidade prestadora.

6 O abono da prestación económica procederá ata o último día do mes de falecemento da persoa usuaria na prestación vinculada de atención residencial; e no resto, ata que se xustifique o correspondente gasto.

Artigo 37. Pago da prestación económica de cuidados na contorna familiar.

1. O importe da prestación abonarase mensualmente.

2. Os efectos económicos do recoñecemento ao dereito á prestación económica de cuidados na contorna familiar produciranse a partir do día primeiro do mes seguinte á data de resolución do procedemento.

Ao mesmo tempo, abonarase como último pago a mensualidade total correspondente ao mes no que se extinga a prestación económica por falecemento da persoa beneficiaria ou se produza a súa baixa por calquera outro motivo.

Artigo 38. Pago e xustificación do mantemento do dereito á prestación económica de asistencia persoal

1. No prazo dun mes desde a notificación da resolución do procedemento referido no artigo 26, a persoa beneficiaria debe acreditar ante o departamento territorial da consellería con competencias en materia de servizos sociais, mediante fotocopia compulsada do orixinal da factura emitida para o efecto ou certificación acreditativa da entidade prestadora do servizo, que efectuou o gasto do servizo ao que se vincula a prestación concedida.

2. O importe da prestación abonarase mensualmente.

3. De ser o caso, e se a persoa usuaria presta expresamente o seu consentimento, a achega do duplicado orixinal das facturas, así como do pagamento efectivo destas, poderá ser remitido pola entidade prestadora.

4. A persoa beneficiaria deberá comunicar ao departamento territorial da consellería con competencias en materia de servizos sociais no prazo máximo de un mes, os cambios relativos ao/a asistente persoal, para os efectos de comprobar o cumprimento dos requisitos establecidos neste Decreto e na súa normativa de desenvolvemento. No caso de que o/a asistente persoal non cumpra co previsto neste decreto e na súa normativa de desenvolvemento, o departamento territorial da consellería con competencias en materia de servizos sociais interromperá o pago da prestación económica ata que non se cumpra co establecido.

CAPÍTULO II

Procedemento de reintegro das prestacións indebidamente percibidas

Artigo 39. Ámbito de aplicación

1. O procedemento establecido no presente título aplicarase polos departamentos territoriais da consellería con competencias en materia de servizos sociais, cando, como consecuencia da revisión do dereito previamente recoñecido, resulten prestacións indebidamente percibidas.

2. O procedemento ao que se refire o apartado anterior será aplicable nos supostos en que os departamentos territoriais da consellería con competencias en materia de servizos sociais constaten:

- a) Omisións ou inexactitudes nas declaracións das persoas beneficiarias.
- b) Cando proceda a rectificación de erros materiais ou de feito e os aritméticos.
- c) Cando se constate unha percepción indebida nas prestacións económicas derivada dos procedementos de revisión de oficio regulados nos artigos 106 e seguintes de Lei 39/2015, do 1 de outubro.

Artigo 40. Procedemento de reintegro

1. O procedemento iniciarase, por acordo do titular do departamento territorial da consellería con competencias en materia de servizos sociais, tan pronto como teña coñecemento dos feitos ou circunstancias que fundamenten o inicio do procedemento segundo o disposto nos artigos anteriores, tramitándose nun só expediente nos termos sinalados nos parágrafos seguintes e resolvéndose no prazo máximo de tres meses, contados a partir da data do mencionado acordo. O dito acordo seralle notificado ao interesado.

2. O órgano instrutor, unha vez redactada a proposta de resolución, remitiraa a persoa interesada dándolle coñecemento da mesma así como poñéndolle de manifesto as actuacións practicadas e os feitos ou datos coñecidos e as consecuencias que deles derivan, conforme á normativa vixente, ao obxecto de que poida presentar as alegacións ou documentos que estime convenientes.

Ao mesmo tempo, se procede, efectuarase proposta de reintegro da débeda de acordo coas regras establecidas nos artigos 41 e 42, ao fin de que a persoa interesada manifieste a súa conformidade ou formule, no seu caso, propostas alternativas para as porcentaxes para aplicar aos descontos, sempre que das mesmas resulten unhas contías superiores ás que derivan das mencionadas regras.

3. Para os efectos sinalados, concederáse a persoa interesada un prazo de quince días, contados a partir do día seguinte a aquel no que teña lugar a notificación.

4. Recibidas as alegacións ou documentos da persoa interesada ou transcorrido o prazo concedido sen que a persoa interesada presente alegacións ou novos documentos, o instrutor elevará a proposta de resolución ao titular do departamento territorial da consellería con competencias en materia de servizos sociais para a súa resolución. A resolución que corresponda á vista de todos os datos obrantes no expediente será motivada e fará mención expresa dos seguintes extremos:

- a) Determinación das causas que motivaron a débeda, especificándose o período ao que esta se refire e a contía.
- b) Fixación, no seu caso, da nova contía da prestación que corresponda percibir e data dos efectos económicos.
- c) Procedencia do reintegro das cantidades indebidamente percibidas, especificando o procedemento para facelo efectivo e, no seu caso, determinación do importe e prazos do desconto.
- d) Prazo e órgano ante o cal pode interpoñerse recurso de alzada.

5. Na notificación da resolución á que se refire o apartado anterior, informarase a persoa debedora sobre a posibilidade de proceder ao abono voluntario do importe íntegro da débeda nun só prazo, dentro dos trinta días seguintes ao da notificación, acompañando para o efecto os formularios precisos para efectuar o devandito ingreso.

Transcorrido o prazo sinalado sen que a persoa debedora acredite o pago da débeda, mediante o correspondente recibo xustificativo do mesmo, aplicaranse os descontos fixados na resolución.

Artigo 41. Desconto da prestación económica

Cando como consecuencia da revisión do dereito previamente recoñecido, resulten prestacións indebidamente percibidas segundo o disposto no artigo anterior e a persoa debedora das mesmas sexa, de forma simultánea, acreedora dalgunha das prestacións económicas do sistema para a autonomía e a atención á dependencia xestionadas polos departamentos territoriais da consellería con competencias en materia de servizos sociais, estes efectuarán os correspondentes descontos sobre as devanditas prestacións económicas para resarcirse da débeda contraída pola persoa beneficiaria, salvo nos supostos nos que a propia persoa debedora opte por abonar a débeda nun só pago.

Artigo 42. Regras de determinación dos descontos

Se para o pago da débeda se resolveu a aplicación de descontos sobre as sucesivas mensualidades das prestacións que corresponda percibir a persoa debedora, teranse en conta as seguintes regras:

- a) Aplicarase o desconto mensual dunha cantidade comprendida entre o 21 e o 30% do importe total da prestación ou prestacións económicas que se perciban debidamente, cando a contía da prestación ou prestacións percibidas sexa igual ou superior á metade da prestación económica máxima establecida nese momento.
- b) A porcentaxe aplicable oscilará entre o 15 e o 20%, cando o importe das prestacións económicas que se perciban debidamente non alcance a contía sinalada na letra anterior.
- c) En todo caso, nos supostos de prestacións inferiores á contía da pensión mínima de xubilación establecida en cada momento, a porcentaxe oscilará entre o 10 e o 14%.
- d) O órgano xestor incrementará o importe dos descontos cando a aplicación das regras anteriores non permita cancelar a débeda nun prazo máximo de tres anos, contados a partir da data na que teña efecto o desconto para practicar, na cantidade necesaria que permita o seu reintegro dentro de devandito prazo.
- e) As porcentaxes aludidas poderán incrementarse cando no expediente, tramitado de acordo co procedemento regulado no presente decreto, conste manifestación da persoa interesada en tal sentido.

Artigo 43. Notificación ao departamento territorial da Consellería de Facenda

Nos supostos en que non fose posible aplicar o procedemento de reintegro por desconto ou nos que aplicándose o devandito procedemento, por falecemento da persoa debedora, extinción das prestacións económicas que percibira ou por

calquera outra causa, non fose posible seguir efectuando os descontos necesarios para cancelar a débeda no prazo correspondente, de acordo co previsto no artigo anterior, o órgano xestor notificará ao departamento territorial correspondente da Consellería de Facenda a resolución definitiva pola que se declarou a procedencia do reintegro e informará sobre a contía pendente de pago, coa finalidade de que este inicie o procedemento de xestión recadatoria, previsto na Orde do 21 de xullo de 1998 (DOG núm. 182, do 7 de agosto), pola que se regula o procedemento de recadación nos supostos de reintegros de axudas ou subvencións públicas, pensións asistenciais e subsidios económicos.

CAPÍTULO III

Devolución de ingresos indebidos

Artigo 44. Devolución de ingresos indebidos

Nos supostos de exceso no pago por parte das persoas beneficiarias da súa participación nas prestacións ou servizos que reciba, dará lugar a un expediente de ingresos indebidos da Administración de acordo co establecido na Lei 6/2003, do 9 de decembro, de taxas, prezos e exaccións reguladoras da Comunidade Autónoma de Galicia, no Decreto 61/2005, do 7 de abril, polo que se ditan as normas para a aplicación das taxas e prezos da Comunidade Autónoma de Galicia, na Lei 58/2003, do 17 de decembro, xeral tributaria, e o Real decreto 520/2003, do 17 de decembro, polo que se aproba o seu desenvolvemento en materia de revisión en vía administrativa.

Disposición adicional primeira. Equipos técnicos de valoración da discapacidade

Os equipos técnicos de valoración da discapacidade, constituídos segundo o establecido na Orde do 25 de novembro de 2015, pola que se regula o procedemento para o recoñecemento, declaración e cualificación do grao da discapacidade, e a organización e funcionamento dos órganos técnicos competentes, poderán exercer as funcións que se atribúen polo presente decreto aos órganos de valoración e asesoramento da dependencia para os casos e procedementos que lle sexan asignados polo órgano superior con competencias na área de valoración da discapacidade, segundo o establecido polo decreto no que se regule a estrutura orgánica da consellería con competencias en materia de servizos sociais.

Disposición adicional segunda. *Persoas que teñan recoñecida a necesidade de asistencia de terceira persoa de acordo co Real decreto 1971/1999*

1. Nos supostos de persoas que teñan recoñecida a necesidade de asistencia de terceira persoa, de acordo co anexo II do Real decreto 1971/1999, do 23 de setembro, de procedemento para o recoñecemento, declaración e cualificación do grao de discapacidade, o recoñecemento da situación de dependencia realizarase a instancia da persoa interesada ou, no seu caso, da persoa que exerza a súa representación.

2. Nestes casos, as persoas que teñan recoñecidos de 45 a 72 puntos de complemento de necesidade de concurso doutra persoa, recoñeceráselle un grao III de dependencia, conforme ao disposto no apartado 2 da disposición adicional primeira do Real decreto 174/2011, do 11 de febreiro, non sendo preciso realizar unha nova valoración, nin achegar o informe de saúde a que se refire o artigo 15 do presente decreto

Disposición adicional terceira. *Actualización dos modelos normalizados*

De conformidade coa Disposición adicional sexta da Lei 4/2019, do 17 de xullo, de administración dixital de Galicia, os modelos normalizados aplicables na tramitación dos procedementos regulados nesta disposición, poderán ser actualizados co fin de mantelos adaptados á normativa vixente. Para estes efectos será suficiente a publicación dos modelos actualizados na sede electrónica da Xunta de Galicia, onde estarán permanentemente accesibles para todas as persoas interesadas, sen que sexa necesaria unha nova publicación no Diario Oficial de Galicia.

Disposición transitoria primeira. *Procedementos iniciados*

1. Os procedementos para o recoñecemento da situación de dependencia e do dereito ás prestacións do Sistema para a Autonomía e Atención á Dependencia iniciados con anterioridade á entrada en vigor do presente decreto rexeranse polas disposicións contidas no presente decreto, mantendo a súa validez os trámites xa realizados conforme á normativa anterior, aplicándose o novo procedemento aos actos posteriores.

2. Cando por aplicación do novo procedemento sexa preciso a realización dun trámite imprescindible para a súa resolución non contemplado no anterior procedemento regulado polo Decreto 15/2010, do 4 de febreiro, seralle requirido a persoa interesada de oficio pola Administración.

Disposición transitoria segunda. *Formación dos/das asistentes persoais*

De forma transitoria, e ata que se regule especificamente o requisito de formación dos/as asistentes persoais e a forma da súa adquisición, entenderase cumprido este requisito por quen se atope prestando este tipo de servizo e así o acredite, mediante contrato, cunha antigüidade de, polo menos, seis meses.

Os/as asistentes persoais que non se atopen na situación anterior deberán formalizar o compromiso de realizar a formación que no seu momento se determine para o seu desenvolvemento.

Disposición derogatoria única. *Derrogación normativa*

O presente Decreto derroga as seguintes normas:

- a) Decreto 15/2010, do 4 de febreiro, polo que se regula o procedemento para o recoñecemento da situación de dependencia e do dereito ás prestacións do sistema para a autonomía e atención á dependencia, o procedemento para a elaboración do Programa Individual de Atención e a organización e funcionamento dos órganos técnicos competentes.
- b) Artigo 18 do Decreto 49/2013, do 5 de setembro, polo que se define a carteira de servizos sociais para a promoción da autonomía persoal e a atención ás persoas en situación de dependencia e determínase o sistema de participación das persoas usuarias no financiamento do seu custo.
- c) Calquera outra norma de igual ou inferior rango que se opoña ao disposto na presente norma.

Disposición final primeira. *Procedementos de coordinación sociosanitaria*

En cumprimento do disposto no artigo 11.1º c) da Lei 39/2006, do 14 de decembro, mediante disposición conxunta dos departamentos autonómicos competentes en materia de saúde e de servizos sociais estableceranse os procedementos de coordinación entre o Sistema Público de Servizos Sociais e o Sistema de Saúde, así como os instrumentos que procedan para garantir unha efectiva atención ás persoas en situación de dependencia.

Disposición final segunda. *Desenvolvemento e execución*

Autorízase á persoa titular da consellería con competencias en materia de servizos sociais para ditar cantas disposicións resulten necesarias para o desenvolvemento e execución deste decreto.

Disposición final terceira. *Entrada en vigor*

Este decreto entrará en vigor aos seis meses da súa publicación no «Diario Oficial de Galicia» ou na data anterior que se determine por resolución da persoa titular da consellería competente en materia de servizos sociais, publicada o «Diario Oficial de Galicia».

Santiago de Compostela,

Alberto Núñez Feijóo
Presidente

Fabiola García Martínez
Conselleira de Política Social